



Ciorclán 0044/2020

Scéim Deontais Teagasc Baile 2020/2021 - Comhpháirt Oideachais Speisialta

1. Réamhrá

Tá faisnéis san imlitir seo maidir leis an Scéim Deontais um Theagasc Baile agus ba cheart d'iarratasóirí í a léamh go cúramach sula líonfadh siad isteach an Fhoirm Iarratais ábhartha, HTSEN1 nó HTMED1.

Tá eolas san imlitir ar:

- Cuspóir na Scéime
- Na critéir incháilitheachta faoi théarmaí na scéime
- Leithdháileadh uaireanta faoi théarmaí na scéime
- Critéir maidir le soláthar Cúnaimh Deontais (Riachtanais Cáilíochta agus Grinnfhiosrúcháin na dTeagascóirí)
- Cosaint Leanaí
- Nósanna Imeachta maidir leis an Deontas a Íoc
- Faisnéis ghinearálta
- Fiosruithe agus achomhairc

Beidh an imlitir seo, chomh maith leis an eolas ábhartha uile, ar fáil le híoslódáil ó shuíomh gréasáin na Roinne <https://www.education.ie>

Príomhphointí na hImlitreach:

Leagtar amach cuspóir na Scéime um Theagasc Baile i gCuid 2

- Is é cuspóir na Scéime um Theagasc Baile ná airgead a chur ar fáil faoi chomhair seirbhís chúiteach oideachais a sholáthar do leanaí nach féidir leo dul ar scoil ar roinnt cúiseanna sonracha ar leith. Mar sin féin, ba cheart a thabhairt faoi deara nach rogha mhalartach í an Scéim Deontais um Theagasc Baile ar áit a fháil i socrúchán scoile agus nach gcuirtear ar fáil ach i gcúinsí sainiúla, an-teoranta í.

Leagtar amach i gCuid 3 na critéir incháilitheachta faoi 3 chatagóir den Scéim.

- Leanaí idir 2.5 agus 3 bliana d'aois a diagnóisíodh go bhfuil uathachas orthu

- Leanaí a bhfuil Riachtanais Speisialta Oideachais acu agus a bhfuil áit oideachais á lorg acu i scoil aitheanta
- Daltaí a bhfuil riocht suntasach míochaine orthu, nó fóibe scoile agus/nó dúlagar nó imní gaolmhar a chuir isteach go mór ar thinreamh scoile agus is dócha a chuirfidh isteach go mór ar an tinreamh san am atá le teacht.

Leagtar amach i gCuid 4 na huaireanta atá leithdháilte faoi gach catagóir.

- Ba cheart d'iarratasóirí na huaireanta atá leithdháilte faoi gach catagóir a thabhairt faoi deara.
- Ba cheart d'iarratasóirí a thabhairt faoi deara freisin go ndéanfar leithdháiltí do shiblí ar bhonn comhcheangailte.

Leagtar amach i gCuid 5 na critéir chun Cúnamh Deontais a sholáthar faoin Scéim, lena n-áirítear na ceangaltais cháilíochta, chlárúcháin agus grinnfhiosrúcháin do sholáthraithe teagaisc.

- Ceann de choinníollacha na Scéime is ea go mbeidh teagascóirí cáilithe san earnáil oideachais ábhartha agus go mbeidh siad cláraithe leis an gComhairle Mhúinteoireachta ar feadh thréimhse an teagaisc cheadaithe, suas go dtí eisiúint na híocaíochta deiridh agus an íocaíocht sin san áireamh.
- Sa chás nach féidir le hiarratasóir teacht ar mhúinteoir atá cáilithe go hiomlán féadfaidh an Roinn cead a thabhairt chun duine a earcú atá cláraithe le Comhairle Mhúinteoireachta na hÉireann agus a bhfuil bunchéim aige nó aici (leibhéal 7 ar a laghad ar an gCreat Náisiúnta Cáilíochtaí) i réimse atá ábhartha.
- Ní mór don Bhiúró Náisiúnta Grinnfhiosrúcháin grinnfhiosrúchán a dhéanamh ar gach teagascóir trí phróiseas grinnfhiosrúcháin ar líne Chomhairle Mhúinteoireachta na hÉireann, sula gcuirfear tús le soláthar an teagaisc.
- Ní mór do na teagascóirí uile Cuid 4, Foirm Ghealltanais agus Dearbhú Reachtuil a shíniú agus a chur isteach.
- Níl cead ag Tuismitheoirí/Caomhnóirí dlíthiúla feidhmiú mar theagascóirí dá leanaí féin faoin Scéim.

Tá eolas faoi cheisteanna maidir le Cosaint Leanaí le fáil i gCuid 6.

Tá eolas maidir le Covid-19 i gCuid 7.

Tá eolas maidir le híocaíocht an deontais um Theagasc Baile le fáil i gCuid 8.

- Tá nóta mionsonraithe faisnéise faoi chúrsaí íocaíochta ar fáil ag <https://www.education.ie/ga/Tuismitheoirí>
- Ba cheart a thabhairt faoi deara nach ndéanfar cistiú um theagasc baile a shiardhátú i gcás ar bith.

Tá eolas ginearálta maidir leis an scéim le fáil i gCuid 9.

Ba cheart d'iarratasóirí na nithe seo a leanas a thabhairt faoi deara:

- Déanfar an t-eolas a thabharfar a chomhroinnt idir Ranna Rialtais éagsúla agus an Chomhairle Náisiúnta um Oideachas Speisialta.
- Ní féidir uaireanta nár úsáideadh i seachtain amháin a aistriú go seachtain eile.
- Tá sé de fhreagracht ar an tuismitheoir/caomhnóir dlíthiúil socrúchán scoile a lorg agus an leanbh a chlárú le scoil.
- Sa chás nár chláraigh tuismitheoir/caomhnóir leanbh i socrúchán scoile atá ainmnithe ag an gComhairle Náisiúnta um Oideachas Speisialta (CNOS), ní chuirfear deontas um Theagasc Baile ar fáil.
- Is é an ról atá ag an Eagraí Riachtanas Speisialta Oideachais (ERSO) ná a dheimhniú go gcomhlíonann an leanbh na critéir incháilitheachta a bhaineann leis an Scéim Deontais um Theagasc Baile.
- Más mian le tuismitheoirí nó caomhnóirí dlíthiúla é, féadfaidh siad a bheith páirteach i socrú grúpa nua le tuismitheoirí/caomhnóirí dlíthiúla leanaí eile a bhfuil teagasc baile cheadaithe ina

leith nó páirt a ghlacadh i socrú grúpa más rud é go bhfuil comhaontú reatha déanta leis an Roinn maidir leis. Ní hé ról na Roinne, áfach, soláthar dá leithéid a chur ar bun. Ní mór do thuismitheoirí/chaomhnóirí dlíthiúla na socrúithe sin a fhoinsiú agus a sholáthar.

- Ní mór do dhaltáí atá ag déanamh staidéar ar ábhair sna Scrúduithe Sóisearacha agus Ardteistiméireachta riachtanais Choimisiún na Scrúduithe Stáit a léamh go cúramach maidir le hobair chúrsa phraiticiúil. Mura gcomhlíontar riachtanais Choimisiún na Scrúduithe Stáit, d'fhéadfadh sé tarlú nach mbeadh an mac léinn in ann na marcanna go léir atá ar fáil don ábhar a bhaint amach.

Tá sonraí teagmhála le fáil i gCuid 10 maidir le fiosruithe agus achomhairc faoin scéim.

Tá foirm iarratais HTSEN1 le comhlánú do leanaí a bhfuil Riachtanais Speisialta Oideachais acu agus atá ag lorg socrúcháin oideachais nó do leanaí idir 2.5 agus 3 bliana d'aois a diagnóisíodh go bhfuil Neamhord Speictrim Uathachais (NSU) orthu.

Tá foirm iarratais HTMED1 le comhlánú do dhaltáí le comhlánú do dhaltáí a bhfuil riocht mór leighis nó fóibe scoile ag cur as dóibh agus/nó dúlagar nó imní gaolmhar.

Ráiteas príobháideachais

Cuireann an Roinn Oideachais agus Scileanna, a mhéid is indéanta agus ag féachaint do na hacmhainní atá ar fáil, oideachas agus oiliúint ar fáil do dhaoine a bhfuil cónaí orthu sa Stát ar leibhéal atá oiriúnach chun freastal ar riachtanais agus ar chumas na ndaoine sin. Is é an príomhchuspóir atá ag an Roinn nuair a éilíonn sí na sonraí pearsanta a sholáthraíonn tú ná chun incháilitheacht i leith na Scéime Deontais um Theagasc Baile a chinneadh. Féadfar na sonraí pearsanta a chuirtear ar fáil a roinnt le FSS, TUSLA (an Ghníomhaireacht um Leanaí agus an Teaghlach), an Chomhairle Náisiúnta um Oideachas Speisialta (CNOS), an Roinn Leanaí agus Gnóthaí Óige (DCYA), an Roinn Oideachais agus Scileanna (NEPS san áireamh) agus na Coimisinéirí Ioncaim chun cinneadh a dhéanamh faoi incháilitheacht i leith na Scéime Deontais um Theagasc Baile, chun íocaíochtaí a phróiseáil, chun a chinntiú nach ndéantar aon mhaoiniú a dhúbailt agus chun críocha staitistiúla. Is féidir teacht ar an bhFógra Príobháideachais ag <https://www.education.ie/en/The-Department/Data-Protection/gdpr/parents-children/ath-2-06-2-07-10-6-privacy-notice-for-the-home-tuition-scheme.pdf>, áit a bhfuil breis eolais faoin Scéim seo.

Tá na sonraí ar fad faoi pholasaí Cosanta Sonraí na Roinne, ina leagtar amach conas a úsáidimid do shonraí pearsanta nó sonraí do linbh, chomh maith le faisnéis maidir le do chearta mar ábhar sonraí, ar fáil ag

<https://www.education.ie/en/The-Department/Data-Protection/gdpr/gdpr.html>.

Tá mionsonraí an pholasaí seo ar fáil i gcóip chrua ach é a iarraidh ón seoladh atá luaite ar leathanach 14.

2. Cuspóir na Scéime

Is é cuspóir na Scéime Deontais um Theagasc Baile ná seirbhís chúiteach oideachais a sholáthar maidir le

- (a) hIdirghabháil luath-oideachais do leanaí a bhfuil uathachas ag gabháil dóibh a chomhlíonann critéir incháilitheachta na Scéime.
- (b) Mic léinn a bhfuil riachtanais speisialta oideachais acu atá ag lorg socrúcháin oideachais i scoil aitheanta.
- (c) Mic léinn, atá cláraithe i scoileanna, agus a bhfuil riocht suntasach leighis ag gabháil dóibh, nó fóibe scoile agus/nó dúlagar/imní gaolmhar, a chuir isteach go mór ar a bhfreastal ar scoil, agus ar dócha go leanfaidh sé ar aghaidh ag cur isteach air.

Is é an cur chuige is fearr ná oideachas a chur ar leanaí i suíomhanna scoile ina bhféadfaidh rochtain a bheith acu ar mhúinteoirí láncháilithe, ar chláir oideachais a bheidh saincheaptha don duine aonair, ar chúntóirí riachtanas speisialta, ar an gcraclam scoile ina bhfuil an rogha, más féidir agus más cuí, de bheith imeasctha go hiomlán nó go páirteach le daltaí eile agus idirghníomhaíocht a bheith acu leo. Mar sin tá Teagasc Baile ceaptha mar bheart eatramhach amháin do leanaí nach bhfuil áit ar fáil dóibh i scoile aitheanta agus níor chóir breathnú air mar rogha mhalartach ó thaobh socrúcháin scoile a fháil.

3. Na critéir incháilitheachta faoi théarmaí na scéime

Catagóir (a) Idirghabháil Luath do Leanaí a bhfuil NSU ag gabháil dóibh (a ndearnadh measúnú orthu go bhfuil Neamhord Speictrim Uathachais orthu bunaithe ar chritéir DSM V nó ICD 10)

- (1) Leanaí idir 2.5 agus 3 bliana d'aois ar tugadh diagnóis fúthu go bhfuil Neamhord ar Speictream an Uathachais orthu.
- (2) Leanaí idir 3 agus 4 bliana d'aois ar tugadh diagnóis go bhfuil neamhord ar speictream an uathachais orthu agus nach bhfuil socrúchán luath-idirghabhála ar fáil dóibh, faoi mar atá dearbhaithe ag an NCSE.
- (3) Páistí os cionn 4 bliana d'aois (nach sroichfidh 6 bliana d'aois i rith na scoilbhliana 2019/20) ar diagnósíodh go bhfuil NSU orthu agus ar moladh go mbeadh socrúchán luath-idirghabhála acu agus nach bhfuil a leithéid de shocrúchán ar fáil dóibh, mar atá deimhnithe ag an CNOS.

Ba cheart don iarratasóir agus don Eagraí Riachtanais Speisialta Oideachais (ERSO) Cuid 2 (A) den fhoirm iarratais HTSEN1 a chomhlánú do leanaí idir 2.5 agus 3 bliana d'aois.

Ba cheart don iarratasóir agus don ERSO Cuid 2 (B) den fhoirm iarratais HTSEN1 a chomhlánú do pháistí idir 3 agus 4 bliana d'aois agus páistí os cionn 4 bliana d'aois ar moladh do gcuirfí socrúchán luath-idirghabhála ar fáil dóibh.

Luath-Idirghabháil

Tacaíonn an Stát le luath-idirghabháil do leanaí a bhfuil riachtanais speisialta oideachais acu trí chistiú a sholáthar do roinnt áiteanna i gcreiseanna nó i réamhscoileanna lena n-áirítear:

- Ranganna Luath-Idirghabhála i scoileanna príomhshrutha agus i scoileanna speisialta
- Suíomhanna Luath-Idirghabhála atá a reáchtáil ag soláthraithe seirbhíse a fhaigheann cistiú ó FSS
- Suíomhanna réamhscoile a fhaigheann tacaíocht faoi Scéim um Chúram agus Oideachas na Luath- Óige (ECCE) agus faoin tSamhail Rochtana agus Cuimsithe (AIM)
- Suíomhanna príobháideacha réamhscolaíochta a dtugann FSS cúnamh deontais dóibh nó Cúntóir Réamhscoile a dtugann FSS deontas dó nó di
- Scéim Deontais um Theagasc Baile do leanaí idir 3 agus 4 bliana d'aois a bhfuil diagnóis maidir le huathachas déanta fúthu agus nach bhfuil ionad Luath-idirghabhála ar fáil

I gcúinsí áirithe féadfar forlíonadh a dhéanamh ar an deontas um Theagasc Baile i leith freastail i socrúchán luath-idirghabhála (seachas ranganna luath-idirghabhála i scoileanna príomhshrutha agus scoileanna speisialta), mura bhfuil socrúchán ar fáil i Rang Luath-idirghabhála. Iarrtar ar Thuismitheoirí/Chaomhnóirí dlíthiúla a insint an bhfuil a leanbh ag baint leasa as aon cheann de na scéimeanna atá luaithe thuas.

Má bhaineann leanbh leas as ceann de an scéimeanna tar éis don iarratas ar dheontas do Theagasc Baile a bheith faofa, ní mór do na tuismitheoirí/caomhnóirí dlíthiúla fógra a thabhairt don Roinn seo láithreach.

Tabhair faoi deara, le do thoil, gurb é 10 n-uaire an chloig in aghaidh na seachtaine an líon uasta uaireanta ar féidir leas a bhaint astu faoi na scéimeanna thuas do leanaí idir 2½ agus 3 bliana d'aois agus 20 uair an chloig sa tseachtain do leanaí os cionn 3 bliana d'aois.

Catagóir (b) Leanaí a bhfuil Riachtanais Speisialta Oideachais acu agus a bhfuil socrúchán scoile á lorg acu

Is féidir le leanaí a bhfuil Riachtanais Speisialta Oideachais acu agus atá 4 bliana d'aois agus níos sine, leas a bhaint as Teagasc Baile nuair nach bhfuil socrúchán scoile ar fáil mar atá deimhnithe ag an CNOS, tríd an Eagraí Riachtanas Speisialta Oideachais (ERSO) áitiúil.

Déanfaidh an CNOS measúnú ar infhaighteacht socrúcháin scoile ag féachaint don diagnóis ábhartha agus don tuarascáil ghairmiúil ábhartha, ach gan a bheith teoranta dóibh.

Beart eatramhach is ea an Scéim Deontais um Theagasc Baile chun oideachas a sholáthar go dtí go mbeidh socrúchán oideachais ar fáil. Nuair a bheidh socrúchán scoile ar fáil, cuirfear deireadh leis an Deontas um Teagasc Baile.

Is féidir ceann díobh seo a leanas a bheith i gceist le socrúchán scoile:

- Áit i rang príomhshrutha i scoil phríomhshrutha.
- Áit i rang speisialta i scoil phríomhshrutha.
- Áit i scoil speisialta.

Ba cheart don iarratasóir agus don ERSO Cuid 2 (C) den fhoirm iarratais HTSEN1 comhlánú.

Catagóir (c) Mic léinn, atá cláraithe i scoileanna, agus a bhfuil riocht suntasach leighis ag gabháil dóibh, nó fóibe scoile agus / nó dúlagar nó imní gaolmhar, a chuir isteach go mór ar a bhfreastal ar scoil, agus ar dócha go leanfaidh sé ar aghaidh ag cur isteach ar a bhfreastal.

Déantar measúnú ar incháilitheacht ag féachaint do na critéir seo a leanas, ach gan a bheith teoranta dóibh

- Leibhéil freastail an mhic léinn i rith na scoilbhliana roimhe sin.
- Tuairisc ghairmiúil nó mhíochaine ábhartha - is féidir tuairisc ar leith a iarraidh i gcásanna áirithe más gá.

Ní cuirfear Teagasc Baile ar fáil mar gheall ar dhúnadh éigeandála na scoileanna amháin.

Mic léinn le riosca an-ard (fíor-shoghonta) nach féidir leo filleadh ar an scoil mar gheall ar Covid-19

D'fhéadfadh sé nach mbeadh sé indéanta do roinnt daltaí filleadh ar an scoil mar go léiríonn na treoirlínte ábhartha sláinte poiblí go bhfuil siad in ardriosca nó fíor-shoghonta.

Is ar an scoil ina bhfuil siad ar rolla a bheidh an fhreagracht fhoriomlán maidir lena chinntiú go mbeidh an tacaíocht chúí ar fáil do na mic léinn sin le foghlaim a dhéanamh.

Tá treoir á heisiúint chuig bunscoileanna agus iarbhunscoileanna le tacú le scoileanna agus socruithe a chur ar bun do mhic léinn mar sin.

Is ceart do thuismitheoirí leanaí atá in ardriosca de bharr Covid-19 teagmháil a dhéanamh lena scoileanna ionas gur féidir socruithe a dhéanamh le tacaíocht a thabhairt dá leanbh.

Fóibe Scoile agus neamhoird imní ghaolmhara

I **gcásanna eisceachtúla** breithneoidh an Roinn iarratais ar theagasc baile i gcás na ndaltaí a bhfuil diagnóis déanta orthu maidir le fóibe scoile agus/nó dúlagar nó imní gaolmhar **a chuir isteach, agus ar dócha go leanfaidh sí ar aghaidh ag cur isteach go mór ar a bhfreastal ar scoil.** Ní bheidh feidhm ag an eisceacht seo ach amháin nuair a bhíonn neamhláithreacht leanúnach ón scoil ag teastáil chun idirghabháil leighis nó theiripeach chuí a éascú chun go mbeidh an dalta in ann páirt a ghlacadh sa scoil arís.

Maidir le hiarratais i leith mic léinn a bhfuil diagnóis déanta orthu maidir le fóibe scoile agus/nó dúlagar nó imní gaolmhar, beidh feidhm ag an bprionsabal nach féidir Teagasc Baile a sholáthar mar mhalairt ar fhreastal ar scoil.

Déantar measúnú ar incháilitheacht i gcásanna eisceachtúla ag féachaint do na critéir seo a leanas, ach gan a bheith teoranta dóibh:

- Leibhéil freastail an mhic léinn i rith na scoilbhliana roimhe sin.
- Tuarascáil an tsíceolaí / an tsíciatraí
 - i. a dheimhneodh go soiléir diagnóis faoi fhóibe scoile agus / nó dúlagar nó imní gaolmhar.
 - ii. Tabhair sonraí faoi phleananna idirghabhála leighis nó theiripeacha atá i bhfeidhm d'fhonn an mac léinn a ath-imeascadh ina scoil féin.
- Sonraí faoi theagmháil leis na gníomhaireachtaí tacaíochta ábhartha (m.sh. Scoil, an tSeirbhís Náisiúnta Síceolaíochta Oideachais (NEPS), Oifigeach Leasa Oideachais (EWO), Seirbhísí Meabhairshláinte do Leanaí agus do Dhaoine Óga (CAMHS), TUSLA (an Ghníomhaireacht um Leanaí agus an Teaghlach), FSS, CNOS).

Tabhair faoi deara: Ní hé gnó gairmithe a dhéanann diagnóiseanna Teagasc Baile a mholadh mar mhalairt ar scoil. Ní chuirfear moltaí den sórt sin san áireamh agus iarratas á chinneadh.

Ba cheart do Phríomhoide na scoile agus don chleachtóir leighis Cuid 2(A) den fhoirm iarratais HTMED1 a chomhlánú do mhic léinn a bhfuil riocht suntasach leighis orthu.

Ba cheart do Phríomhoide na scoile Cuid 2 (B) den fhoirm iarratais HTMED1 a chomhlánú agus ba cheart go gcuirfeadh síceolaí/síciatraí an mhic léinn tuairisc ar fáil.

Tá Treoir Dea-Chleachtais FSS/NEPS maidir le diúltú scoile ar fáil ar shuíomh gréasáin na Roinne Oideachais agus Scileanna ag an nasc seo a leanas:

<https://www.education.ie/en/Schools-Colleges/Services/National-Educational-Psychological-Service-NEPS-/NEPS-Guides/School-Refusal/>

4. Leithdháileadh uaireanta faoi théarmaí na scéime

(a) Leanaí idir 2.5 agus 3 bliana d'aois (a ndearnadh measúnú orthu agus a bhfuarthas go bhfuil Neamhord Speictream Uathachais (NSU) orthu, bunaithe ar chritéir DSM V nó ICD 10).

Is é 10 n-uair an chloig teagasc in aghaidh na seachtaine an deontas is mó um theagasc baile i leith leanaí suas le 3 bliana d'aois a bhfuil NSU orthu.

(b) Leanaí a bhfuil Riachtanais Speisialta Oideachais acu agus a bhfuil socrúchán scoile á lorg acu

Is é 20 uair an chloig teagasc baile sa tseachtain an méid uasta a dheonófar i leith leanaí atá ag feitheamh ar shocrúchán, faoi réir an fhéilire scoile chuí. Sa chás go bhfuil leanbh ag freastal ar luath-idirghabháil nó ionad príobháideach réamhscoile (féach cuid 3a thuas), is iad na huaireanta teagasc baile a dháilfear ná an difríocht idir na huaireanta a cheadaítear sa réamhscoil nó san ionad luath-idirghabhála agus na huaireanta uasta um theagasc baile a mbeadh an leanbh incháilithe le fáil sa ghnáthchúrsa faoi théarmaí na Scéime seo.

Faoin scéim, i gcásanna áirithe agus i gcás gur cuí, ag féachaint do na critéir, féadtar síneadh a chur leis an Teagasc Baile go deireadh mhí Iúil.

(d) Mic léinn, atá cláraithe i scoileanna, agus a bhfuil riocht suntasach leighis ag gabháil dóibh, nó fóibe scoile agus/nó dúlagar nó imní gaolmhar, a chuir isteach go mór ar a bhfreastal ar scoil, agus ar dócha go leanfaidh sé ar aghaidh ag cur isteach ar a bhfreastal

De ghnáth féadfar cúnamh deontais idir 2 uair agus 10 n-uair an chloig a cheadú sa chaoi go mbeidh an leithdháileadh ag teacht le leibhéal an tinrimh sa scoilbhliain roimhe agus cibé an raibh an tinreamh ar leibhéal na bunscoile nó na hiar-bhunscoile. Mar threoir ginearálta, féadfar suas le 5 huair an chloig a leithdháileadh ar leanaí atá ar leibhéal na bunscoile agus, idir 2 uair agus 10 n-uair an chloig a leithdháileadh ar dhaltaí ag leibhéal na hiar-bhunscoile.

Leithdháileadh uaireanta do shiblí

Beidh na leithdháiltí uile ar shiblí ag teacht le prionsabal grúpála na scoileanna .i. más rud é, mar thoradh ar an gcóimheas idir daltaí agus múinteoir in ionad scoile go bhféadfar múinteoir amháin a leithdháileadh ar rang ina bhfuil seisear leanaí mar aon le leanaí d'aoiseanna éagsúla agus de chumas difriúil ar an leibhéal cuí oideachais (eadhon, leibhéal na bunscoile nó na hiar-bhunscoile). Táthar ag súil go mbeidh sé de chumas ag Teagascóirí Baile teagasc a fhorbairt agus a chur ar fáil i ngrúpaí ina bhfuil páistí eile. Mar sin féin, aithníonn an Roinn go bhféadfadh sé a bheith deacair freastal ar riachtanais dhifreálte suntasacha oideachasúla roinnt siblí trí chur chuige difreálte i

dteagasc sa bhaile. Chun foráil a dhéanamh dó seo, deonaíonn an Roinn méadú i gcomhdháileadh na n-uaireanta do shiblínní ar an gcéad iarratas.

Breithneoidh an Roinn iarratais ar leithdháiltí ar leith a cheadú i gcás go n-eascaíonn cúinsí eisceachtúla a thabharfadh údar chun leithdháiltí ar leithligh a thabhairt do shiblínní.

5. Critéir maidir le Cúnamh Deontais a Sholáthar

Cáilíochtaí soláthraithe teagaisc

Toisc go gcuirtear an teagasc ar fáil lasmuigh den ghnáthstruchtúr scoile tá sé tábhachtach go mbeadh teagascóirí baile cáilithe chun clár oideachais a sholáthar. Dá réir sin, tá sé ar cheann de choinníollacha na Scéime nach mór do thuismitheoirí/caomhnóirí dlíthiúla teagascóir a earcú atá cáilithe san earnáil ina bhfuil an teagasc á sholáthar, agus atá cláraithe leis an gComhairle Mhúinteoireachta ar feadh tréimhse an teagaisc cheadaithe, suas go dtí eisiúint na híocaíochta deiridh, agus an íocaíocht sin san áireamh.

I gcás ina dteipeann ar gach iarracht múinteoir atá cáilithe chun dul i mbun teagaisc san earnáil i dtrácht a earcú, féadfaidh an Roinn machnamh a dhéanamh ar dhuine a earcú atá cláraithe leis an gComhairle Mhúinteoireachta agus a bhfuil bunchéim aige nó aici (ar leibhéal 7 ar a laghad ar an gCreat Náisiúnta Cáilíochtaí) i réimse ábhartha, m.sh. an tSíceolaíocht.

Ceann de cheanglais na Scéime is ea nach mór do mhúinteoirí fógra a thabhairt don Chomhairle Mhúinteoireachta chun a gcuid sonraí a chur ar fáil ar an gComhéadan Pámháistir trí shuíomh gréasáin na Comhairle Múinteoireachta, chun go bhféadfaidh an Roinn seo a dheimhniú go bhfuil clárú reatha ag múinteoirí. Is féidir an áis seo a chumasú sa chuid 'Mo Chlárú' ar shuíomh gréasáin na Comhairle Mhúinteoireachta www.teachingcouncil.ie.

D'fhonn a bheith incháilithe chun an ráta íocaíochta cáilithe a fháil, ní mór do theagascóir a bheith cláraithe agus aitheanta ag an gComhairle Múinteoireachta san earnáil ina bhfuil an teagasc á chur ar fáil. Maidir le teagascóirí, atá ar scor, atá cláraithe leis an gComhairle Mhúinteoireachta agus atá ag fáil íocaíochtaí pinsin na seirbhíse poiblí, íocfar iad ar ráta mionathraithe - Féach Aguisín 1 le haghaidh tuilleadh sonraí.

I gcás ina bhféachann teagascóir Teagasc Baile a sholáthar do bheirt leanaí nó níos mó, beidh sé riachtanach amchlár a sholáthar ina bhfuil cur síos ar na huaireanta a chuirfear ar fáil sular féidir cead a thabhairt chun tús a chur leis an teagasc.

Is ar Thuismitheoirí/Caomhnóirí atá an dualgas teagascóir a aimsiú a luaithe agus is féidir sa chaoi is go bhféadfaidh an teagascóir iarratais ar chlárú/ghrinnfhiosrú a dhéanamh ar an gComhairle

Mhúinteoireachta más gá. Ní choinníonn an Roinn seo liostaí de theagascóirí atá ar fáil chun Teagasc Baile a thabhairt. B'fhéidir gur chabhair é dul i dteagmháil le scoileanna áitiúla ar an gcéad dul síos, nó mar mhalairt air sin, tá a fhios ag an Roinn go mbaineann go leor tuismitheoirí úsáid as suíomhanna gréasáin faoi sholáthraithe oideachais chun teagascóirí a fhógairt nó go deimhin fógraí a chur i nuachtáin áitiúla nó ar chláir fógraí siopaí nó pobail.

Níl cead ag Tuismitheoirí/Caomhnóirí feidhmiú mar theagascóirí dá leanaí féin faoin Scéim.

Ní ceart tús a chur le Teagasc Baile go dtí go bhfaigheann an tuismitheoir/caomhnóir dlíthiúil litir cheadaithe ag deimhniú dáta tosaithe an teagaisc, agus go gceadaíonn an Roinn go foirmiúil i scríbhinn cáilíochtaí agus aitheantas an teagascóra/na dteagascóirí ainmnithe.

Níl múinteoir atá ag baint leas as saoire cheadaithe íoctha nó neamhíoctha óna f(h)ostaíocht incháilithe chun Teagasc Baile a sholáthar. Is féidir áfach múinteoir atá ar Shos Gairme nó ag roinnt poist a fhostú mar theagascóir don Scéim Theagasc Baile.

Faoin Scéim Iasachta, níl sé cheadaithe don té atá ar iasacht a bheith fostaithe seachas leis an ósteagraíocht gan toiliú na hóstegraíochta, an fhostóra agus na Roinne/B. Oid agus Oil.

Ní mór cead oibre cuí a bheith ag múinteoirí nach saoránaigh Éireannacha, AE, LEE, nó Eilbhéiseacha iad chun Teagasc Baile a sholáthar sa Stát seo

Riachtanais Ghrinnfhiosrúcháin i gcás Teagascóirí

Ní mór do gach teagascóir a bheith grinnfhiosraithe ag an gComhairle Mhúinteoireachta sula dtosaíonn siad ag teagasc.

- Ní mór do thuismitheoirí/chaomhnóirí dlíthiúla iad féin a shásamh go bhfuil an próiseas seiceála comhlánaithe ag an teagascóir/na teagascóirí roghnaithe trí phróiseas seiceála ar líne na Comhairle Múinteoireachta.
- Ní mór don Chomhairle Mhúinteoireachta grinnfhiosrúchán a dhéanamh ar gach teagascóir ón dáta ar chuireadh chun feidhme na hAchtanna um an mBiúró Náisiúnta Grinnfhiosrúcháin 2012 (Leanaí agus Daoine Soghonta) 2012, rud a rinneadh ar an 29 Aibreán 2016.
- Ní mór do thuismitheoirí/chaomhnóirí dlíthiúla nochtadh grinnfhiosrúcháin nua-eisithe a iarraidh in imthosca ina bhfuil siad ag fostú teagascóra den chéad uair.
- I gcás inar fhostaigh an tuismitheoir/caomhnóir dlíthiúil an teagascóir roimhe sin agus go ndearnadh an teagascóir a ghrinnfhiosrú i ndiaidh an 29 Aibreán 2016, moltar do thuismitheoirí/chaomhnóirí dlíthiúla breithniú an bhfuil grinnfhiosrúchán nua-eisithe riachtanach. D'fhéadfadh an tuismitheoir nó an caomhnóir dlíthiúil na tosca seo a leanas a chur san áireamh agus cinneadh á dhéanamh an bhfuil gá le grinnfhiosrúchán nua-eisithe:

- An tréimhse ama ó fuarthas grinnfhiosrúchán roimhe sin.
- Cibé an bhfuil aon bhearnaí i stair fostaíochta/ghairme/oideachais an duine nár tugadh cuntas sásúil orthu
- An bhfuil tagairtí cuimsitheacha curtha ar fáil maidir le tréimhsí fostaíochta roimhe seo

Ní liosta uileghabhálach é an méid thuas de na tosca ar féidir le tuismitheoirí/caomhnóirí dlíthiúla a chur san áireamh.

- Is ceart do thuismitheoirí/chaomhnóirí dlíthiúla a thabhairt faoi deara gur féidir le gach múinteoir cláraithe iarratas a dhéanamh ar ghrinnfhiosrúchán trí shuíomh gréasáin na Comhairle Mhúinteoireachta. Tá an próiseas saor in aisce ach féadfaidh sé idir 2 agus 4 seachtaine a thógáil.
- Is féidir le tuismitheoirí/caomhnóirí dlíthiúla a dhearbhu go ndéantar grinnfhiosrú ar theagascóirí, agus féachaint ar thoradh agus dáta an ghrinnfhiosrúcháin sin trí thoradh cuardaigh grinnfhiosrúcháin na dteagascóirí, ar a dtugtar Nochtadh Grinnfhiosrúcháin, ar féidir leis an teagascóir é a roinnt trí réiteach slán TF ar líne na Comhairle Múinteoireachta, ar a dtugtar Digitaly.
- Ba chóir go dtuigfeadh tuismitheoirí/caomhnóirí dlíthiúla nach soláthraíonn grinnfhiosrúchán imréiteach do theagascóirí chun oibriú le leanaí, ach soláthraíonn sé sonraí faoi aon taifead coiriúil agus/nó faisnéis shonraithe i leith an teagascóra lena mbaineann nó, i gcás nach bhfuil aon taifead coiriúil nó faisnéis shonraithe i gceist, tugann sé é sin le fios. Is faoin tuismitheoir/gcaomhnóir dlíthiúil lena mbaineann atá sé an cinneadh deiridh a dhéanamh maidir le hoiriúnacht an duine, ó thaobh cosanta leanaí de, chun oibriú leis an leanbh nó leis na leanaí. Chuige sin, ba cheart do thuismitheoirí/chaomhnóirí dlíthiúla a mheabhru nach bhfuil i ngrinnfhiosrúchán an Gharda Síochána ach gné amháin nuair a bhíonn an cinneadh sin á dhéanamh.
- Is gné riachtanach de dhea-chleachtas um chosaint leanaí iad seiceálacha cuimsitheacha ar oiriúnacht an duine agus is iad na tuismitheoirí/caomhnóirí dlíthiúla atá freagrach astu. Ba cheart go n-áireofaí leo, bíodh is nach bhfuil siad teoranta dóibh, teistiméireachtaí a lorg agus a sheiceáil agus a chinntiú go dtugtar cuntas sásúil ar aon bhearnaí gan mhíniú atá i dtaifid fostaíochta nó i gcurriculum vitae an té sin. Níor chóir go nglacfaí le grinnfhiosrúchán in áit na seiceálacha sin ach ní mór é a úsáid mar chuid díobh.
- Tabhair faoi deara go gcaithfidh Foirm Dhearbhaithe Reachtúil agus Foirm Ghealltanais (Aguisíní 1 & 2 faoi seach den Fhoirm Iarratais ábhartha) a bheith ag gabháil le gach iarratas ar Theagasc Baile.

- Tá faisnéis iomlán do theagascóirí maidir leis an bpróiseas chun iarratas a dhéanamh ar ghrinnfhiosrúchán ar fáil ag: <https://www.teachingcouncil.ie/ga/Grinnfhiosru/>

6. Cosaint Leanaí

Chuir an tAire Leanaí agus Gnóthaí Óige an tAcht um Thús Áite do Leanaí 2015, i bhfeidhm go hiomlán Dé Luain an 11 Nollaig 2017, agus chuir sé sin bonn reachtúil faoi ghnéithe de Tús Áite do Leanaí - Treoir Náisiúnta um Chosaint agus Leas Leanaí.

In [Tús Áite do Leanaí: Treoir Náisiúnta um Chosaint agus Leas Leanaí](#) tugtar treoir faoi na hoibleagáidí reachtúla nua a bhaineann le daoine sainordaithe amhail múinteoirí cláraithe agus na hoibleagáidí reachtúla nua a bhaineann le heagraíochtaí (mar scoileanna) faoin Acht. Leagtar amach ann freisin na dualgais dea-chleachtais (neamhreachtúla) atá i bhfeidhm i gcás gach duine aonair (múinteoirí san áireamh) agus gach earnáil sa tsochaí. Feidhmíonn an tAcht um Thús Áite do Leanaí, 2015 taobh le taobh le Tús Áite do Leanaí: Treoir Náisiúnta um Chosaint agus Leas Leanaí (2017).

Is féidir faisnéis faoi Chosaint Leanaí a fháil ar shuíomh gréasáin na Roinne ag <https://www.education.ie/ga/Tuismitheoirí/Eolas/Cosaint-Leanaí/Eolas.html>

Ós rud é go gcuirtear Teagasc Baile ar fáil lasmuigh de ghnáthstruchtúr na scoile, ba cheart do thuismitheoirí/chaomhnóirí dlíthiúla a bheith san airdeall ar rioscaí breise nó ar chontúirtí féideartha a bhaineann le teagascóirí a fhostú go príobháideach. Tá sé de dhualgas ar na thuismitheoirí/caomhnóirí dlíthiúla a chinntiú go bhfuil gach cosaint chuí agus cosaint riachtanach maidir le cosaint agus leas leanaí i bhfeidhm maidir leis an an socrú teagaisc. (Féach freisin Cuid 5 thuas maidir le riachtanais seiceála).

- Ba chóir do thuismitheoirí/chaomhnóirí dlíthiúla iad féin a shásamh go bhfuil teagascóirí ar an eolas faoi riachtanais leighis nó iompraíochta a linbh.
- Tá sé de dhualgas ar thuismitheoirí/chaomhnóirí dlíthiúla gach seiceáil ábhartha a dhéanamh maidir le hoiriúnacht teagascóra ionchais chun oibriú lena leanbh/leanaí agus a chinntiú go bhfuil sé nó sí oiriúnach chun teagasc a thabhairt dá leanbh.

7. Treoir maidir le COVID-19 le scaipeadh COVID-19 a chosc le linn a bheith rannpháirteach i dteagasc baile

Tá treoir foilsithe ag an Roinn Oideachais agus Scileanna maidir le COVID-19 le tacaíocht do thuismitheoirí agus teagascóirí bearta a bhunú le scaipeadh COVID-19 a chosc le linn a bheith rannpháirteach sa teagasc baile. Tá an treoir ar fáil ar shuíomh gréasáin na Roinne www.education.ie agus déanfar nuashonrú air má thagann athrú ar an gcomhairle sláinte phoiblí.

Tá sé d'aidhm ag an treoir seo sonraí a thabhairt maidir le:

- Comhairle ghinearálta le scaipeadh an víris a chosc
- Riachtanais Speisialta Oideachais
- Bearta Rialaithe

Má bhíonn cúinsí eisceachtúla ann a chiallaíonn nach féidir le teaghlach leas a bhaint as teagasc baile mar gheall ar Covid-19 ceadóidh an Roinn teagasc a sholáthar trí chianfhoghlaim.

Sna cúinsí sin déanfar maoiniú a eisiúint le haghaidh gach uair an chloig de theagasc trí chianfhoghlaim nó ríomhfhoghlaim.

8. Nósanna Imeachta maidir leis an Deontas a Íoc

- Is trí shocrú príobháideach a fhostaíonn tuismitheoirí/chaomhnóirí dlíthiúla teagascóirí chun Teagasc Baile a sholáthar. Tá na híocaíochtaí a dhéantar le teagascóirí thar ceann tuismitheoirí faoi réir asbhaintí reachtúla ag an bhfoinse. Feidhmeoidh an Roinn mar ghníomhaire párolla thar ceann na dtuismitheoirí/caomhnóirí dlíthiúla amháin. Éascóidh sé sin comhlíonadh na bhforálacha reachtúla ó thaobh asbhaintí lena n-áirítear forálacha cánach agus forálacha gaolmhara.
- Tá na Rátaí Deontais um Theagasc Baile leagtha amach in **Aguisín A**.
- Íocfaidh an Roinn an Deontas Teagasc Baile go díreach leis an teagascóir faofa.
- Níor chóir do thuismitheoirí tús a chur le Teagasc Baile go dtí go bhfaigheann siad litir ceadaithe deontais ón Roinn ag deimhniú go gcomhlíonann siad téarmaí agus coinníollacha na Scéime agus dáta tosaithe an chúnaimh deontais.
- Cuirtear in iúl do thuismitheoirí/do chaomhnóirí dlíthiúla nach ndéanfar íocaíochtaí um theagasc baile a shiardhátú i gcás ar bith.
- Caithfidh an tuismitheoir/caomhnóir dlíthiúil a rinne iarratas ar theagasc baile Foirm Éilimh Íocaíochta a chomhlánú. Is ceart don tuismitheoir/chaomhnóir dlíthiúil agus don teagascóir araon an fhoirm éilimh chomhlánaithe a shíniú ag deireadh gach míosa inar cuireadh teagasc ar fáil. Tá an fhoirm éilimh íocaíochta ar fáil ag www.education.ie. Féadfar an síniú a sholáthraíonn an tuismitheoir/caomhnóir dlíthiúil a úsáid lena fhíorú.
- Má dhéantar dearbhú bréagach chun acmhainní a éileamh ón Roinn féadfaidh an Roinn an t-ábhar a chur ar aghaidh chuig an nGarda Síochána agus, más cuí, chuig an gComhairle Mhúinteoireachta.

- Is ceart do thuismitheoirí/chaomhnóirí dlíthiúla agus teagascóirí deimhin a dhéanamh go dtuigeann siad go hiomlán an chaoi a n-eiseofar an deontas faoin Scéim seo sula gcuirtear aon teagasc ar fáil. Tá nóta faisnéis íocaíochta mionsonraithe ar leith ar fáil do thuismitheoirí/do chaomhnóirí ar shuíomh gréasáin na Roinne ag <https://www.education.ie/en/Parents/Services/Home-Tuition/Payments.html>
- Meabhraítear do thuismitheoirí/chaomhnóirí dlíthiúla nár cheart dóibh, in imthosca ar bith, íocaíochtaí a dhéanamh le teagascóirí le haghaidh teagaisc a chuireann siad ar fáil faoin Scéim seo.
- Is ceart do thuismitheoirí/chaomhnóirí, do theagascóirí a thabhairt faoi ndeara, go gcuirtear sonraí airgeadais i dtaca leis an scéim seo ar aghaidh go dtí na Coimisinéirí Ioncaim gach bliain faoin reachtaíocht reatha, toisc go bhfuil íocaíochtaí as teagasc baile inríofa ó thaobh cánach de.

Mar a íoctar an deontas

Tá nóta faisnéis íocaíochta mionsonraithe ar leith ar fáil do thuismitheoirí/do chaomhnóirí ar shuíomh gréasáin na Roinne ag <https://www.education.ie/en/Parents/Services/Home-Tuition/Payments.html>

Nithe eile a bhaineann le híocaíochtaí Teagasc Baile:

Chun cloí leis an reachtaíocht reatha, ní mór uimhreacha PSP gach duine, idir thuismitheoirí/chaomhnóirí dlíthiúla agus theagascóirí a sholáthar le gur féidir íocaíocht a mheas.

9. Faisnéis ghinearálta

- Beidh ar thuismitheoirí/chaomhnóirí dlíthiúla Foirm Iarratais a líonadh isteach agus iarrtar orthu aird ar leith a thabhairt ar na doiciméid agus ar an eolas a bheidh ag teastáil. Is ceart a mheabhrú nach mbeidh ceadú ar fáil ach amháin nuair a chuirfeadh an próiseas iarratais i gcrích go hiomlán, trína n-eiseofar an litir cheadaithe ag an deireadh a dheimhniú dáta tosaigh an teagaisc.
- I gcásanna áirithe, nuair nach bhfuil aon teagascóir ainmnithe ag an iarratasóir, eiseofar litir incháilitheachta chuig an iarratasóir go dtí go bhfaightear sonraí an teagascóra. Mar sin féin, **ní féidir** tús a chur le teagasc go dtí go mbeidh teagascóir ainmnithe ag an iarratasóir, na doiciméid ábhartha faighte ag an Roinn agus ceadú iomlán eisithe i scríbhinn chun tús a chur le teagasc.
- Tá an Deontas um Theagasc Baile ann le haghaidh idirghabhálacha oideachasúla teagaisc amháin. Caitheadh dul i dteagmháil le Feidhmeannas na Seirbhíse Sláinte (FSS) má tá

seirbhísí teiripeacha ar nós Teiripe Urlabhra agus Teanga, Teiripe Shaothair, seirbhísí síceolaíochta srl. le cur ar fáil. Ní ceadmhach i gcúinse ar bith cistiú do Theagasc Baile a úsáid chun íoc as seirbhísí den sórt sin. Maidir leis sin, forchoimeádann an Roinn an ceart aici féin measúnú a dhéanamh ar an soláthar oideachais atá á chur ar fáil mar chuid den chistiú atá á sholáthar agus déantar na huaireanta go léir a cheadú faoi réir an choinníll seo.

- Tabhair faoi deara go nglactar le hiarratais ar Theagasc Baile ar an tuiscint go roinnfear an t-eolas a chuirfear ar fáil, lena n-áirítear Uimhir Phearsanta Seirbhíse Poiblí (Uimhir PSP) le FSS, TUSLA (an Ghníomhaireacht um Leanaí agus an Teaghlach), an Chomhairle Náisiúnta um Oideachas Speisialta (CNOS), an Roinn Leanaí agus Gnóthaí Óige (DCYA), na Coimisinéirí Ioncaim agus an Roinn Oideachais agus Scileanna (ROS) ar chúiseanna sonrathite agus chun a chinntiú nach dtabharfar maoiniú faoi dhó.
- Ní féidir uaireanta teagaisc nár úsáideadh i seachtain amháin a aistriú go seachtain eile. Meabhraítear go háirithe do thuismitheoirí/chaomhnóirí dlíthiúla go gcaithfear aird a thabhairt ar an teorainn seachtainiúil seo atá le teagasc agus níor cheart do theagascóir an teorainn sin a shárú le dalta amháin ar bith. Ba cheart go mbeadh Teagasc Baile ag teacht leis an lá scoile (9am – 6 pm). Mar sin, níor chóir Teagasc Baile a thabhairt le linn laethanta saoire scoile, laethanta saoire bainc nó deirí seachtaine.
- Baineann gach tagairt do “scoileanna” nó “socrúcháin scoile” le scoileanna Stáit atá aitheanta faoi Alt 10 (3) den Acht Oideachais 1998.
- Faoi gClár um Chúram agus Oideachas na Luath-Óige (ECCE), tá gach leanbh incháilithe i bPoblacht na hÉireann i dteideal clár iomlán dhá bhliain de chúram agus d’oideachas luath-óige a fháil saor in aisce le linn na tréimhse sula dtosaíonn siad sa bhunscoil. D’fhonn tacú le leanaí faoi mhíchumas rochtain a fháil ar réamhscoil saor in aisce, tugadh isteach mórchlár tacaíochta, an Mód Rochtana agus Cuimsithe (AIM). Is clár tacaíochtaí é an Mód Rochtana agus Cuimsithe (AIM) atá deartha chun a chinntiú gur féidir le leanaí faoi mhíchumas rochtain a fháil ar an gClár Cúraim agus Oideachais Luath-Óige i suíomhanna réamhscoile príomhshrutha agus gur féidir leo páirt iomlán a ghlacadh sa churaclam réamhscoile in éineacht lena bpiaraí. Is féidir sonraí breise a fháil ag <https://aim.gov.ie/ga/>
- Tá sé de dhualgas ar thuismitheoirí/chaomhnóirí dlíthiúla áit scoile a lorg agus leanbh a chlárú sa scoil. Ach má tá comhairle ag teastáil ó thuismitheoirí/chaomhnóirí dlíthiúla nó má tá deacrachtaí acu socrúchán scoile a aimsiú, ba chóir dóibh teagmháil a dhéanamh lena nEagraí Riachtanais Speisialta Oideachais (ERSO) áitiúil. Tá sonraí teagmhála maidir le d’ERSO áitiúil a fháil ag www.ncse.ie. Ní bheidh Teagasc Baile ar fáil má bhíonn áit

scoile aitheanta ag CNOS. Ar an gcaoi chéanna, **ní chruthófar incháilitheacht faoin Scéim seo de thoradh mainneachtain leanbh a chlárú i scoil.**

- B'fhéidir go mba mhaith le Tuismitheoirí/Caomhnóirí dlíthiúla féachaint ar “Starting School - Guidelines for Parents/Guardians of Children with Special Educational Needs” – foilseachán atá ar fáil ar shuíomh gréasáin na Comhairle Náisiúnta um Oideachas Speisialta – www.ncse.ie.
- Má dhiúltaíonn scoil leanbh atá os cionn 4 bliana d'aois a chlárú, tá sé de rogha ag tuismitheoir an diúltú a achomharc faoi alt 29 den Acht Oideachais má bhíonn socrúchán ar fáil sa scoil. B'fhéidir nach mbeidh Teagasc Baile ar fáil mura ndéanfar achomharc faoin diúltú an leanbh a chlárú.
- Tabhair faoi deara nach mbeidh leanbh nár ghlac áit scoile a tairgeadh dó/di incháilithe chun soláthar ar bith a fháil faoin scéim Teagasc Baile ag pointe ar bith i gcaitheamh na scoilbhliana agus nach mbeidh siad incháilithe faoi théarmaí Chlár Oideachais Mhí Lúil.
- Más mian le tuismitheoirí/caomhnóirí dlíthiúla socrú grúpa a dhéanamh le tuismitheoirí/caomhnóirí dlíthiúla eile leanaí ar ceadáíodh teagasc baile dóibh, nó más mian leo leas a bhaint as socrú grúpa ina bhfuil comhaontú reatha déanta faoi leis an Roinn seo, caithfidh siad fógra a thabhairt roimh ré don Rannóg Oideachais Speisialta le faomhadh a fháil chuige.
- Ní mór do dhaltáí atá ag déanamh staidéir ar ábhair sna Scrúduithe Sóisearacha agus Ardteistiméireachta riachtanais Choimisiún na Scrúduithe Stáit a léamh go cúramach maidir le hobair chúrsa phraiticiúil. Tá na hábhair a bhfuil obair chúrsa phraiticiúil ag baint leo liostaithe ag <https://www.examinations.ie/?l=en&mc=ex&sc=he>. Mura gcomhlíontar riachtanais Choimisiún na Scrúduithe Stáit, d'fhéadfadh sé tarlú nach mbeadh an mac léinn in ann na marcanna go léir atá ar fáil don ábhar a bhaint amach.

Ról na Comhairle Náisiúnta um Oideachas Speisialta i gcomhthéacs na Scéime um Theagasc Baile:

I gcomhthéacs iarratas a dhéantar faoin scéim um Theagasc Baile, is é ról an CNOS a dheimhniú nach bhfuil áit ar fáil do leanbh i dtimpeallacht scoile. Más rud é go mbeidh áit i rang speisialta nó i scoil speisialta riachtanach féadfaidh an ERSO comhairle a chur ar thuismitheoirí/chaomhnóirí dlíthiúla dá réir.

Nuair a Bheidh Áiteanna ar Fáil le linn na Scoilbhliana 2020/21

Féadfaidh sé tarlú go mbeidh áiteanna ar fáil i ranganna príomhshrutha, i ranganna speisialta agus/nó i scoileanna speisialta le linn na scoilbhliana – uaireanta go han-luath sa scoilbhliain. I gcás ina bhfuil leanbh os cionn 3 bliana d'aois ag fáil cistiú tríd an Scéim Deontais um Theagasc Baile, agus go dtagann sé de chor sa saol go mbeidh áit ar fáil, cuirfidh an ERSO in iúl do thuismitheoirí/chaomhnóirí dlíthiúla na leanaí uile i scoilcheantar na scoile, agus don Roinn Oideachais agus Scileanna, go bhfuil áiteanna dá leithéid ar fáil.

Beidh ar Thuismitheoirí/Chaomhnóirí a bhfuil cistiú do theagasc baile á fháil acu fianaise a sholáthar don Roinn go ndearna siad iarracht chun an áit atá ar fáil a fháil. Cuirfear deireadh le cistiú do theagasc baile i gcás ar bith nár chuir an tuismitheoir isteach ar a leithéid de shocrúcháin.

Chun go mbeidh siad in ann leanúint ar aghaidh ag fáil deontas um theagasc baile, ní mór do thuismitheoirí/chaomhnóirí dlíthiúla a bheith in ann a thaispeáint don Roinn go ndearnadh a leithéid d'iarratas laistigh de 3 seachtaine ó fhógra a bheith faighte acu ón ERSO agus nár éirigh lena n-iarratas ar chlárú sa scoil.

Sa chás go n-éiríonn le hiarratas an tuismitheora ar chlárú, féadfaidh an Roinn machnamh a dhéanamh, ar iarratas, go leanfadh an Teagasc Baile ar aghaidh ar feadh tréimhse sainithe agus ar bhonn laghdaithe chun ligean don leanbh aistriú chuig an socrúchán nua má mheastar go bhfuil síneadh dá leithéid ar an soláthar riachtanach. Beidh sé seo ag brath go hiomlán, áfach, ar an leanbh a bheith cláraithe sa scoil.

10. Fiosruithe agus Achomhairc

Is féidir fiosruithe agus achomhairc maidir leis an scéim teagasc baile a chur chuig:

An tAonad Teagasc Baile, An Rannóg Oideachais Speisialta, An Roinn Oideachais & Scileanna,
Cor na Madadh, Baile Átha Luain, Co. na hIarmhí N37 X659

Uimhir Theagmhála: 090 648 4187

Seoladh R-phoist: special_education@education.gov.ie

Is féidir achomhairc maidir le cinntí faoin Scéim Deontais um Theagasc Baile a sheoladh chuig:

Is féidir achomhairc maidir le cinntí faoin Scéim Deontais um Theagasc Baile a sheoladh i scríbhinn chuig an seoladh thíos, agus an Uimhir Thagartha um Theagasc Baile á lua, mar aon le hachóimre ar na cúiseanna atá leis an achomhairc agus doiciméid nó tuarascálacha breise, de réir mar is cuí.

Riachtanais Speisialta agus Deontais Teagaisc, An Roinn Oideachais & Scileanna, Cor na Madadh, Baile Átha Luain, Co. na hIarmhí N37 X659

Uimhir Theagmhála: 090 648 3996

Seoladh R-phoist: htpayments@education.gov.ie

Seoladh R-phoist: special_education@education.gov.ie

Eddie Ward
Príomhoifigeach
An Rannóg Oideachais Speisialta

Iúil 2020

AGUISÍN A

An Scéim Deontais um Theagasc Baile

Rátaí Deontais:

Tá dhá ráta íocaíochta ann don Deontas Teagaisc Baile a bhaineann le teagascóirí a thugann Teagasc Baile - an ráta caighdeánach agus an ráta leasaithe.

D'fhéadfadh rátaí íocaíochta a athrú ó am go chéile. Is iad seo a leanas na rátaí infheidhme:

Ráta Deontais Chaighdeánaigh um Theagasc Baile:

Do mhúinteoirí atá cláraithe leis an gComhairle Mhúinteoireachta nuair a bhíonn

Scoláire bunscoile á theagasc ag Bunmhúinteoir Cáilithe:

€38.33 in aghaidh gach uair a oibrítear.

Scoláire iar-bhunscoile á theagasc ag Múinteoir Iar-bhunscoile Cáilithe:

€46.04 in aghaidh gach aon uair a chaitear ag obair.

Ráta Deontais Modhnaithe um Theagasc Baile:

Múinteoirí nach bhfuil cláraithe leis an gComhairle Mhúinteoireachta mar mhúinteoirí cáilithe san earnáil ina bhfuil an teagasc á sholáthar, gheobhaidh siad ráta mionathraithe íocaíochta. Múinteoirí atá cláraithe agus cáilithe agus a bhfuil pinsean seirbhíse poiblí á fháil acu, gheobhaidh siad an ráta mionathraithe íocaíochta.

Ráta mionathraithe: €34.28 in aghaidh gach aon uair a chaitear ag obair

Tabhair faoi deara go bhféadfadh na rátaí seo a athrú i gcaitheamh na bliana, agus dá réir sin, braithfidh an ráta iníoctha ar an ráta atá i bhfeidhm sa tréimhse ina ndéantar an t-éileamh ina leith.